

# SIMAR keto bay cu reto pa miembro nobo

**ORANJESTAD** - Despues di un reunion cu Simar a yama por a wak cu e interes no tabata halto pa cual aki Sheila Tromp como presidente a splica kico ta e motibonan cu Simar ta sinti cu no tin mucho interes.

Un cos cu tin docentenan demotiva sigur ta e posicion di salario y mas cos cu pa hopi aña un docente no a haya pa cual aki Sra. Tromp ta splica cu tin un luz na caminda di parti gobierno segun e ultimo informacion cu nan a haya di gobierno.

E reunion cu a yama tabata un reunion cu mester a sigui. A atende un punto cu tabata pa e dia ey y mester a yame prome cu scol a cera. Esey a haci cu no tabatin e asistencia cu a pensa cual Simar a premira caba, segun sra. Tromp. "E interes ultimamente pa atende puntonan cu ta regarda nos mes ta un tiki abou y esaki ta conoci caba cu mester bay traha riba dje. Mester traha riba motivacion di nos miembronan pa nan ta mas activo den tuma decision, pa ta mas activo den laga nan bos resona y tambe pa motiva maestro nan nobo pa bira miembro di Simar y yuda contribui na e sindicato." "Si mi mester bisa kico ta nan motivacion pa no bira miembro, como Simar nos ta pensa cu e ta e falta di informacion di kico ta encera un sindicato y pakico bo ta bira miembro di un sindicato," Sra. Tromp a bisa. Un sindicato no ta pa solamente ora cu bo tin un problema, pero simplemente bo sentido di contribui na e sindicato y sostene e lucha. Segun Sra. Tromp, hopi maestro a yega y haya 'e cama cla caba' pues nan no mester a lucha pa locual cu nan tin awe. Esey ta haci cu bo no ta sinti e gana cu mester bo ayudo den e lucha.

## Retonan

Simar tin hopi reto y un di nan ta cu aña escolar ta bay cuminsa atrobe pues mester wak e orario cu ta haya como scol pa traha den Simar. Ta trahando riba un campaña cu lo cuminsa cun'e na luna di augustus pa recrutar miembro nobo y e lo caba na december unda cu lo tin un premio atractivo. Reunionnan cu minister no ta contento



con nan ta bay, y a papia esey cun'e pa wak con por comparti y yuda yega na un solucion. Tambe tin reto di e demas directivanan di scol pasobra Simar a ripara cu hopi problema riba e parti huridico ta bin di parti di e directiva mes. E parti di estructuracion di salario tambe ta bay sinta y mira con ta haci esaki como cu e no ta un aumento cu mester tuma luga como cu pa 20 aña e salario a keda mescos mientras cu costo di bista a subi. Edificio di Simar tambe tin su reto di con ta bay haci esaki mas rendabel.

## Gobierno

A compronde cu gobierno for di aña pasa fondonan pa esaki a wordo presupuesta y un parti di dje ta bay wordo uza for di e fondonan Europeo cu ta bay haya. Kisas ta wak esaki facil pero tin hopi otro cosnan cu mester ta na luga pa haci esaki. A compronde di minister cu ta kedando cla cu esaki unda cu e mester a pasa den parlamento pa acorda e fondo Europeo cu parti di dje lo wordo uza pa esaki. "Den principio nos di Simar a cuestiona esaki pasobra si e tabata den presupuesto caba y aworaki ta uza esey for di fondonan Europeo. Pero aworaki cu luna di augustus dreña, ta bay sinta bek como cu e temporada ta yegando unda cu e compania mester a traha cu e directiva di scol

pa wak con leu nos ta y pa cuminsa implementa esaki

na januari 16." Sra. Tromp a finalisa. □